

Во Вторник 4-я седмицы Вечера.

На Господи воззвах, поставим стихов 6, и поем стихиры подобны Триоди.

Глас 6:

Подобен: Всю отложивше:

Посреде земли претерпел еси Крест и страсть Щедре, / всем безстрастие и избавление подая, / преполовлением днешь постов: / сего ради вси в поклонение того предлагаем, / и радостно облобызаем, / видети Твоя страсти, и живоносное Воскресение, / просвещени божественными добродетельми, / Слове Божий, да сподобимся вси, / едине Многомилостиве.

Подобен:

Мертв был еси на Кресте простерт, / и копием прободен, / и желчию долготерпеливе напаяемь, / Меррския воды Владыко, / рукою Моисевою в сладость преложивый. / Темже молюся Тебе и прошу: / страсти горчайшия от мысли моя отжени, / и покаяния медом ум мой усладив, / поклонника мя покажи / честныя страсти Твоя.

Ина, глас 1.

Подобен: Древле Моисею:

Егоже древле Моисей проображ дланьма своима, / побеждаше Амалика, великий Крест днешь, / пред очима нашими зряще людие предлежимый страшно, / прикоснемся чистотою, умом же и устнама: / на нем бо Христос вознесся умертвивый смерть. / И таковыя благодати вси сподобившися, / песньми Богодухновенными / всех Спаса песнословяще, / молимся достигнути и самое спасительное Воскресение.

Ины стихиры подобны. Глас 4.

Подобен: Дал еси знамение:

Приидите поклонимся жизни нашея ходатаю, / явленному древу днешь, Христа Бога нашего Кресту, / имже смерть уязвися, / и воскресение нам падшим обновися яве, / избавившему зовуще: / нас ради волею пострадавый, да спасеши всяческая, / Боже наш, слава Тебе.

Держава необоримая христианом нам дадеся Крест Твой Спасе наш, / имже иноплеменных языков побеждаются множества, / и мир Церкви Твоей Христе осеняет, / православящей добре. Егоже ныне целующе, / Тебе тепле взываем: / части сподоби и нас святых Твоих.

Слезами очистивше душевныя чувства, / и постом очистившися, приидите поклонимся Крестному древу, / имже упражняются душетленные плоти воздержанием взыграния, / распеншемуся зовуще: / Твоего Спасе, / сподоби тридневнаго востания поклонитися сиянию.

Слава, и ныне, глас 8:

Днесь Владыка твари, и Господь славы, / на Кресте пригвождается, / и в ребра прободается, / желчи и оцта вкушает, / сладость церковная. / Венцем от терния облагается, / покрываяй небо облаки: / одеждею облачится поругания, / и заушается брэнною рукою, / рукою создавый человека: / по плещема биен бывает, одеваяй небо облаки. / Заплевания и раны приемлет, / поношения и заушения. / И вся терпит мене ради осужденнаго, / Избавитель мой и Бог, да спасет мир / от прелести яко благоутробен.

В Минеи же оставляем, и глаголем канон святаго на Повечерии.

Прокимен псалом 67, глас 6: Воспойте Господеви, пойте имени Его.

Стих: Путесотворите возшедшему на запады.

Бытия чтение. [Глава 9, ст. 8 – 17.]

Рече Бог Ноеви, и сыном его с ним, глаголя: Се Аз поставляю завет Мой вам, и семени вашему по вас, И всякой души живущей с вами, от птиц, и от скот, и всем зверем земным, елика с вами [суть] от всех изшедших из ковчега. И поставлю завет Мой с вами: и не умрет всяка плоть ктому от воды потопныя, и ктому не будет потоп водный, еже истлити всю землю. И рече Господь Бог Ноеви: сие знамение завета, еже Аз даю между Мною и вами, и между всякою душею живою, яже есть с вами в роды вечныя: Дугу мою полагаю во облаце, и будет в знамение завета [вечнаго] между Мною и землею. И будет егда наведу облаки на землю, явится дуга Моя во облаце: И помяну завет Мой, иже есть между Мною и вами, и между всякою душею живущею во всякой плоти, и не будет ктому вода в потоп, яко потребити всяку плоть. И будет дуга Моя во облаце: и узрю ю, еже помянути завет вечный между Мною и землею, и между всякою душею живущею во всякой плоти, яже есть земли. И рече Бог Ноеви: сие знамение завета, егоже положих между Мною, и между всякою плотию, яже есть на земли.

Прокимен, псалом 68, глас 6: Спасение Твое Боже, да примет мя.

Стих: Да узрят нищии, и возвеселятся.

Притчей чтение. [Глава 12, ст. 8 – 22.]

Уста разумнаго хвалима бывают от мужа: слабосерд же поругаемь бывает. Лучше муж в безчестии работаяй себе, нежели честь себе обложив, и лишаяйся хлеба. Праведник милует души скотов своих: утробы же нечестивых немилостивны. Делаяй свою землю, исполнится хлебов: гонящии же суетная лишени разума. иже есть сладостен в винном пребывании, в своих твердых оставит безчестие. Желания нечестивых зла, корение же благочестивых в твердостех. За грех устен впадает в сети грешник: избегает же от них праведник. сматраяй кротко, помилован будет: а сретаяй во вратех, оскорбит души. От плодов уст душа мужа наполнится благих: воздаяние же устен его воздастся ему: Путие безумных прави пред ними: послушает советов мудрый. Безумный абие исповесть грех свой: крыет же свое безчестие хитрый. Явленную веру возвещает праведный: свидетель же неправедных лъстив. Суть,

иже глаголюще уязвляют аки мечи: языцы же премудрых исцеляют. Устне истинны исправляют свидетельство: свидетель же скор язык имать неправеден. Лесть в сердце кующаго злая: хотящии же мира, возвеселятся. Ничтоже неправедное угодно есть праведному: нечестивии же исполнятся злых. Мерзость Господеви устне лживы: творяй же верно приятен Ему.

На стиховне самогласен, глас 3. Дважды:

Побеждая мытаря прегрешеньми, не ревную покаянию: / фарисеова же не стяжав исправления, / подражаю возношение. / Но Твоего смирения превосхождением Христе Боже, / бесовское высокоумрие на Кресте / низложивый перваго убо лукавства, / последняго же безумия отчужи мя, / обоих благое предложение в души моей утвердив, / и спаси мя.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Побеждая мытаря прегрешеньми, не ревную покаянию: / фарисеова же не стяжав исправления, / подражаю возношение. / Но Твоего смирения превосхождением Христе Боже, / бесовское высокоумрие на Кресте / низложивый перваго убо лукавства, / последняго же безумия отчужи мя, / обоих благое предложение в души моей утвердив, / и спаси мя.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: Пророцы и апостоли Христовы, и мученицы, / научиша пети Троицу Единосущную, / и просветиша языки заблуждшия, / и общники ангелов сотвориша / сыны человеческия.

Слава, и ныне, самогласен, глас 5:

Зрящи Тя тварь вся на Кресте нага висяща, / Содетеля и Зиждителя всех, / изменяешся страхом и рыдаше: / солнце же свет омрачи, и земля колебашеся, / камение же разседашеся, и храма светлость раздирашеся, / мертвии восташа от гробов, и ангельския силы ужасошася глаголюще: / о чудесе! Судия судится, / и страждет хотя за спасение мира, / и обновление.

В СРЕДУ 4-я СЕДМИЦЫ НА УТРЕНИ, ТРОИЧНЫ.

По 1-м стихословии седальны Крестны Осмогласника.

По 2-м же стихословии глаголем настоящий седален господина Иосифа.

Глас 6.

Подобен: Упование мира:

Воздержания время, / освящающий божественный и всечестный Крест в поклонение лежит, / приступим совестию чистою, / почерпем освящение, и просвещение, / и со страхом возопиим: / Человеколюбче Спасе наш, / слава благоутробию Твоему. [Дважды.]

Крестобогородичен. Подобен:

Предстоящи Кресту Неискусобрачная Мати, / от Нея безсеменно Рождшагося, взываше: / меч сердце Мое пройде, о Сыне! / не терпящи повешена на Древе Тя зрети, / Егоже трепещут всяческая, яко Создателя и Бога, / долготерпеливе, слава Тебе.

По 3-м стихословии седален, господина Феодора. Глас 1.

Подобен: Отчаянная:

Просветившеся добродетельми, / приступим воздержания чистоту стяжавше, / и Кресту честному вопиюще поклонимся: / освяти наша души и телеса, / сподоби нас и пречистой страсти Твоей поклониться, / едине Боже всех, / даруй нам и милости твоя. [Дважды.]

Крестобогородичен, глас тойже.

Подобен: Гроб Твой:

Зрящи Тя Христе, / Всенепорочная Мати, / мертва на Кресте простерта, вопияше: / Сыне Мой собезначальне Отцу и Духови, / кое неизреченное смотрение Твое сие, / имже спасл еси / пречистых рук Твоих Щедре создание?

Канон Креста, егоже краестрочие: Всечестному поклонимся Древу.

Творение господина Феофана. Глас 4.

Песнь 1.

Ирмос: Отверзу уста моя, / и наполнятся Духа, и слово отрыгну Царице Матери, / и явлюся светло торжествуя, / и воспою радуясь Тоя чудеса.

Древу святому, на немже Христос простре длани, побеждая сопротивная начала, поклонимся, постом очистившеся, в хвалу и славу Вседержителя.

Видится предлежимь, освящение подавая, Крест спасительный, к сему приступим, очистивше и тело и сердце, и почерпем благодать спасительную.

Огнем мя очисти заповедей Твоих, Человеколюбче, и Твоя спасительная подаждь ми страсти ныне видети, и любовьию поклониться, Крестом ограждаему, и соблюдаему.

Богородичен: Вознесение видящи на Кресте Твое Человеколюбче, рыдаше зовущи Тя Рождшая: како осужден, хотяй всем судити, видится всяй славы Господь?

Песнь 3.

Ирмос: Твоя песнословцы Богородице, / живой и независтный источнике, / лик себе совокупльшия, духовно утверди, / в божественней Твоей славе / венцев славы сподоби.

Поста водою сердца очистивше, древо Крестное верно обыдем, на немже Христос вися, воду нам оставления яко Благодетель источи.

Крестным ветрилом окрилившеся, корабль спасительный се поста преполовивше, Мессиа Иисусе Боже, имже нас страсти Твоя к пристанищу окорми.

Образоваше Моисей тя на горе врагов на убиение, Кресте: мы же воображаем тя сердцем, и зряще тя, и покланяющися, побеждаем враги безплотныя силою твоею.

Богородичен: Хотением Твоим Человек был еси, Бог сый, и всех Творец: и ныне на Кресте Тя висима зрю, Сыне Мой, Христе, Тя рождшая глаголаше, и сердцем уязвляюся.

Трипеснец, глас 6:

Песнь 3.

Ирмос: Господь сый всех:

Господь сый всех, и Зиждитель Бог, посреде земли на Кресте вознеслся еси, к Себе вознося человеческое существо, падшее злым врага советом. Темже Тя верно славим, страстию Твоею утверждаеми.

Очистивше чувства пощения светом, Креста мысленными лучами, богато вернии озаримся, и сей благоговейно подлежащий днесь зряще, устнами чистыми, и усты и сердцем целуем.

Месту, на немже стоясте нозе Христовы, поклонимся божественному Кресту, на камени Божиих заповедей утвердиться ногам просяще души наша, направитися сея стопам на путь мирный, Божественною благодатию.

Богородичен: Из Отроковицы безмужныя прошел еси Христе, приим от Сея плоть мысленную и одушевленную, и Крестом Твоим врага потребив, истлевшее человеческое существо паки обновил еси: темже славим благоутробие Твое.

Иный. Глас 1.

Ирмос: Утверди Господи Церковь Твою, / юже стяжал еси силою Креста Твоего, / имже врага победил еси, и просветил еси вселенную.

Восплещите вси концы песньми, зряще покланяемое Древо, на немже Христос повешен бысть, и диавол уязвися.

Предлагается днесь живоносная радость, приидите вси поклонимся со страхом Христову честному Кресту, да примем Духа Святаго.

Троицен: Трилучное Солнце, трисиянный Свете, Боже Отче, Сыне, и Святыи Душе, безначальное Естество, и славо, поющия Тя избави от бед.

Богородичен: Поют Тя чини ангельстии, благословенная Богородице всепетая и Дево, с нимиже ныне Тя род человеческий, яко Безневестную славословит.

Слава Тебе Боже наш слава Тебе.

Грядый прикоснутися тебе живоносный Кресте, ужасаюся языком и мыслью, провидя, яко на тебе излился Господа моего Божественная кровь.

Ирмос: Утверди Господи Церковь Твою, / юже стяжал еси силою Креста Твоего, / имже врага победил еси, и просветил еси вселенную.

Седалны, глас 6. Самогласны:

Днесь пророческое исполнися слово: / се бо покланяемся на место, / идеже стоясте нозе Твои Господи, / и Древа спасения вкушивше, / греховных страстей свободу улучихом, / молитвами Богородицы, / едине Человеколюбче.

Слава: Крест Твой Господи освятися, / в нем бо бывают исцеления / болящим во гресех: / имже Тебе припадаем, помилуй нас.

И ныне: Токмо водрузися древо Христе Креста Твоего, / основания поколебашася смерти Господи: / Егоже бо поглоти желанием ад, / отпусти трепетом. / Явил еси нам спасение Твое Святыи, / и славословим Тя Сыне Божий, помилуй нас.

Песнь 4.

Ирмос: Седяи в славе, / на престоле Божества, во облаце легце, / прииде Иисус Пребожественный, / нетленною дланию, и спасе зовущия: / слава, Христе, силе Твоей.

Воображая знамение Креста, руце простираше пременением, внучата древле Иаков славный благословляя, и знаменуя спасительное благословение, на всех нас приходящее.

Соблюдаеми печатю Креста, и предлежаща с радостию духа того целующе, к спасительным страстем идем, губительныя страсти плотския умертвивше.

Спасительное тя оружие, непобедимую победу, радости знамение, имже смерть умертвися, обымем, славою украшающуюся на тебе Пригвождшагося, Кресте всечестный.

Богородичен: Видимый Мною, видимь был еси ангелом непрístupный, Иисусе Сыне Мой, плоть от Мене заимоваый: и ныне зряци Тя на Древе пригвождена, рыдаю, Христова Мати глаголаше.

Песнь 5.

Ирмос: Ужасошася всяческая / о божественной славе Твоей: / Ты бо Неискусобрачная Дево, / имела еси во утробе над всеми Бога, / и родила еси Безлетнаго Сына, / всем воспевающим Тя / мир подавающая.

Мертв был еси на Кресте пригвождаемь, всем сый жизнь и спасение: сего убо даруй, очищенную душею Спасе, нам объяти, и Твоя страсти спасительныя видети радующимся.

Предстоят чинове Тебе безплотных трепещуще, Древо живородительное: на тебе бо честную кровь Свою Христос излиа, лучу испущая издалеча, бесом нося пагубу безконечную.

Оружием уязвеннаго вражим, исцели мя кровию Твоею Слове, и копием, грехов моих вскоре раздери Спасе рукописание, вопию Ти, в книги написуя мя спасенных, яко благоутробен.

Богородичен: Грозд зрелый, како на Древе обесился еси? Солнце славы, како взялся еси, сияние солнца омрачая Спасе страстию Твоею? Рождшая Тя Агница, древле вопияше Ти, матерски восклицающи.

Песнь 6.

Ирмос: Возопи, прообразуя / погребение тридневное, / пророк Иона, в ките моляся: / от тли избави мя, / Иисусе Царю сил.

Стрясл еси водруженный адово жилище, верным же непоколебимое утверждение был еси, известный покров, Господень Кресте всечестный.

Плодоноси добродетельми бывше, обимем божественнаго Древа живоносныя плоды, яже прозябе, прострыйся на сем Иисус, плодовиная лоза.

Поем Твою Иисусе многую благодать, поклоняющеся Кресту Твоему, копию, трости: теми бо разрушил еси вражды Щедре средоградие.

Богородичен: Вод Тя реку животочных роди Всечистая, яко источника нашего обновления, на Кресте простершагося, и капли спасения источившаго.

Ирмос: Возопи, прообразуя / погребение тридневное, / пророк Иона, в ките моляся: / от тли избави мя, / Иисусе Царю сил.

Кондак, глас 7. Самогласен:

Не ктому пламенное оружие хранит врат Едемских, на тыя бо найде преславный союз, Древо крестное: смертное жало, и адова победа прогнася. Предстал бо еси Спасе мой, вопия сущим во аде: внидите паки в рай.

Икос: Три кресты водрузи на Голгофе Пилат, два разбойников, и един Жизнодавца, Егоже виде ад, и рече сущим доле: о слуги мои, и силы моя! кто водрузив гвоздие в сердце мое, деревяным мя копием внезапно прободе? и растерзаюся, внутренними моими болю, утробою уязвляюся, чувства моя смущают дух мой, и понуждаюся изрыгати Адама, и сущия от Адама, древом данныя ми: Древо бо сия вводит паки в рай.

Песнь 7.

Ирмос: Не послужиша твари богомудрии / паче Создавшего, / но огненное прещение мужески поправше, / радовахуся поюще: / препетый отцев Господь и Бог благословен еси.

Секира, юже Елисей взя от Иордана Христе, Крест являше, имже из глубины суетия языки извлекл еси, воспевающия: отцев Господь и Бог благословен еси.

Радуются со земными небесная, поклонению твоему Кресте: тобою бо ангелом и человеком соединение бысть всеильне, вопиющим: Господи Боже благословен еси.

Яко кипарис милосердие, яко кедр же веру благовонную, яко певк истинную любовь приносяще, Господню Кресту поклонимся, на нем славяще Избавителя пригвоздившагося.

Богородичен: Не поколебав небесная, во утробу Твою Бог вселися, граде Божий избранный: на Кресте же вися, тварь поколеба. Егоже моли, на недвижимом камени Его мне соблюстися.

Песнь 8.

Ирмос: Отроки благочестивыя в пещи, / Рождество Богородичо спасло есть, / тогда убо образуемое, / ныне же действуемое, / вселенную всю воздвизает пети Тебе: / Господа пойте дела, / и превозносите Его во вся веки.

Простерл еси руце на Древе, руки неудержимыя разрешая грех: копием же проболся еси, сим борца уязвляя Господи: желчи же вкусил еси, сладную злобу изымая, оцтом напоился еси, всех веселие.

Умом чистым и совестью светло приступивше поклонимся, предлежит честное Древо и святое, имже Христос безчестную подъят смерть, честь наложив высочайшую, преступлением люте обезчестившимся.

Древом греха умертвихся, и вкушением сладным погребохся, оживи мя Господи, воздвигни мя лежащаго, поклонника яви страстей Твоих, и причастника востания Божественнаго, и наследника возлюбивших Тя.

Богородичен: Вознесена Тя видящи, ни доброты в страсти, ни вида имуща, Егоже воплощенна разумех, краснейша паче сынов человеческих, Тя едиnorodный Сыне, Всечистая вопияше Дева: покажи Твою славу, всех спасение.

Иный.

Ирмос: За законы отеческия:

В полудни распеншуся Тебе посреде земли волею, мирския концы из среды гортани змиевы исторгл еси Щедре. Темже в среднюю седмицу божественных постов, поклоняющеся славим честный Крест Твой, Господа пойте, вопиюще, и превозносите во веки.

Радости знамение, оружие нерушимое, Церкви стено, мучеников похвало,

апостолов украшение, архиереев утверждение, укрепив изнемогшую мою душу, поклонитися сподоби, и пети Тебе вопиюща: Господа пойте дела и превозносите во вся веки.

Рыдаю и плачу, егда во уме моем прииму судище неумытное, долготерпеливе, осужден сый. Темже пощади мя, и отягченное бремя души моя облегчи, да радуяся зову: Господа пойте дела, и превозносите во вся веки.

Богородичен: Образоваше купина тайну, паче ума Твоего Рождества, Дево Всенепорочная: якоже бо она, пребыла еси, неопально огонь рождшая Христа Спаса, вознесагося на Крест. Егоже моли, избавити мя огня вечнаго, вопиюща: Господа воспевайте дела, и превозносите во вся веки.

Иный.

Ирмос: Сей нареченный и святыи день, / Един суббот Царь и Господь, / праздников праздник / и торжество есть торжеств: / вонже благословим Христа во веки.

Приидите, Крест предлежащий Господень, постом очистившися, облобызаим любовию: сокровище бо нам священия есть и силы. Темже поем Его во веки.

Сей Крест тричастный и великий, маловидимь сый, небес ширший есть силою своею, человеки к Богу возводит присно: имже благословим Христа во веки.

Благословим Отца, и Сына, и Святаго Духа, Господа.

Едино в трех начертаниих Существо славя, не сливаю единолично трех, ниже пресецаю зрака, Отца, и Сына, со Духом: един бо над всеми Бог в Троице.

И ныне: Едина в матерех показала еси, Дево Богоневесто Марие, без мужа родившая Спаса Христа, чистоты печать сохрани: Тя блажим человецы во веки.

Слава Тебе Боже наш, слава Тебе.

Сие всесвятое Древо да почитится, еже пророк древле вложить в хлеб Христов взывает, от израильтян, распенших Его. Егоже превозносим во вся веки.

Ирмос: Руце в ров верженный львов, / иногда великий во пророцех, / крестообразно простер Даниил, / неврежден от сих снеди спасеся, / благословя Христа Бога во веки.

Песнь 9.

Ирмос: Всяк земнородный / да възиграется Духом просвещаемь, / да торжествует же безплотных умов естество, / почитающее священное торжество Богоматере, / и да вопиет: / радуйся всеблаженная / Богородице, Чистая Приснодево.

Копием Твое ребро отверзаеши, оставления распостирая ми источник: на

Древе же пригвоздился еси, деревом уставляя осуждение, посреде земли, Человеколюбче: еже мы преполовением поста ныне облобызаем, воспевающе Твою благостыню.

Горы сладость, холми радование, любовию искапайте: древа же польская, Ливанстии кедр ликуйте, поклонением днесь живоноснаго Креста: пророцы, мученицы, апостоли, и праведных души възиграйте.

Призри на люди и достояние Твое Господи, страхом поющия Тя, смерть вольную ихже ради претерпел еси, да не победит Твоего благоутробия безмерное множество зол наших: но спаси вся ны Препоблагий Крестом Твоим, яко Человеколюбец.

Богородичен: Мановением Твоим колеблещи видимый мир, распинаемый, пребываеши же висимый, Богородица плачущи глаголаше, страстная умышления первозданнаго Христе, потреби хотя, и исцелити того сокрушение благостию.

Иный.

Ирмос: Недоумет всяк:

Елисей древле из реки сечиво влекий, деревом тя Кресте, животодательное древо воображаше: имже извлече из глубины Христос языки идольскаго бесования, на тебе пригвоздився: темже покланяющеся тебе, державу Его славим.

Солнечныя лучи Спасе, преложишася во тьму, Твоим распятием, осияние же луны угасе: и стихии трепетом изменяхуся вся. Темже вопию Ти: изменена тьмою страстей помышления моя, Слове, Твоею десницею пременив просвети, и спаси мя.

Язвою Твоею исцели души моя страсти: ребр Твоих прободением устави болезненная прободения бесов: гвоздьми Твоими Христе, извозди сластная и страстная похотения, подая ми безстрастно страстем Твоим честным поклонитися, и Воскресению.

Богородичен: Краснаго добротою, родила Тя красная Отроковица, Егоже зрящи ни доброты в страдании, ниже вида имуща, Спасе, рыдающи глаголаше: дивлюся паче ума Сыне Мой, Твоему смирению, имже спасаеши смирившееся естество человеческое.

Иный.

Ирмос: Светися, светися, новый Иерусалиме: / слава бо Господня на тебе возсия, / ликуй ныне / и веселися, Сионе. / Ты же, Чистая, красуйся, Богородице, / о востании Рождества Твоего.

Предгрядите, уяснитеся вси людие Божии, и Древо крестное предвидяще подлежащее, целуйте со страхом, и примите радость, на нем Господа славы вознесшагося славяще присно.

Оружие Божественное ты жизни моей Кресте, на тебе Владыка возшед

спасе мя: источи кровь и воду, прободен в ребра, имже причащаюся радуясь, слава Его.

Троицен: Троице Лицы, Единице Естеством, поклоняюся Тебе Божество Святое, Отцу, и Сыну, со Святым же Духом, единому началу, единому Царству, всеми владычествующему.

Богородичен: Гора великая, в нюже вселися Христос, Ты явилася еси Дево, якоже божественный Давид вопиет: еюже мы вознесохомся к небеси, всынившися Духом Всеблаженная.

Слава Тебе Боже наш, слава Тебе.

Скипетре божественный царский Кресте, воинства мужество, во уповании твоём ратники побеждаем: победы присно тебе кланяющимся на варвары подаждь нам.

Ирмос: О Мати Дево, и Богородице неложная, / рождая безсеменно Христа Бога нашего, / на Крест вознесагося плотию: / Тя вернии вси достойно с Ним / ныне величаем.

Светилен гласа, и настоящий ексапостиларий.

Подобен: Духом:

Преполовлением постов всечестное Древо всех в поклонение призывает, елицы страстьми своими, Христовым стражем достойно споследуют: приидите вси вернии, поклонимся Древу страшнаго таинства.

Крестобогородичен: Безвестная и Всечистая Бога Слова Мати, вопияше кричащи, плачем рыдаючи: сицевыя ли Ми Гавриил радости приносяше благовещения, Чадо? Отыди исполни незыреченный совет и Божественное смотрение.

На стиховне самогласен дне, дважды. Глас 8:

Пощения путь преполовивше, / ведущий ко Кресту Твоему честному, / Твой день видети, егоже виде Авраам, / и возрадовася яко из гроба холма жива Исаака прием. / Благоволи и нас верою избавившихся от врага, / и Вечери причаститися Тайней, / в мире зовущих: / просвещение и Спасителю наш, слава Тебе.

Стих: Исполнимся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Пощения путь преполовивше, / ведущий ко Кресту Твоему честному, / Твой день видети, егоже виде Авраам, / и возрадовася яко из гроба холма жива Исаака прием. / Благоволи и нас верою избавившихся от врага, / и Вечери причаститися Тайней, / в мире зовущих: / просвещение и Спасителю наш, слава Тебе.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Мученицы Христовы непобедимии, / победивше прелесть силою Крестною, / восприяте благодать вечныя жизни, / мучителей прещения не убоястеся, / муками ураняеми веселитеся: / и ныне крови ваша быша исцеления душ наших. / Молите спастися душам нашим.

Слава, глас тойже:

Преполовивше пучину воздержания, / пристанище примем спасения, / время страсти Твоя вольныя Господи: / но яко Благоутробен и Щедр, / и день славнаго Воскресения Твоего, / в мире сподоби нас видети Человеколюбче.

И ныне, паки тойже.

Крестопоклонение же бывает в 1-й час, вонже поем преднаписанныя стихиры недельныя, самогласны, глас 2: Приидите вернии: И прочая. И отпуст.

Прииди=те, ве=рнии,/ Животворя=щему Дре=ву поклони=мся,/ на не=мже Христо=с Царь сла=вы во=лею ру=це распросте=р,/ вознесе= нас на пе=рвое блаже=нство,/ и=хже пре=жде сла=стию укра=д враг,/ изгна=ны от Бо=га сотвори=./ Прииди=те, ве=рнии, Дре=ву поклони=мся,/ Имже сподо=бихомся невидимых враг сокруши=ти главы=./ Прииди=те, вся оте=чествия язы=к,/ Крест Госпо=день пе=сньми почти=м:/ ра=дуйся, Кре=сте, па=дшаго Ада=ма соверше=нное избавле=ние!/ О Тебе= ве=рнии ца=рие на=ши хва=лятся,/ я=ко Твое=ю си=лою исма=ильтеския лю=ди держа=вно покаря=ющии./ Тебе= ны=не со стра=хом христиа=не целу=ем;/ на Тебе= пригвозди=вшася Бо=га сла=вим, глаго=люще:/ Го=споди, на Том пригвозди=выйся, поми=луй нас,\ я=ко благ и Человеколю=бец.

Глас 8:

Днесь Влады=ка тва=ри, и Госпо=дь сла=вы,/ на Кресте= пригвожда=ется/ и в ре=бра пробода=ется,/ же=лчи и о=цта вкуша=ет,/ сла=дость церко=вная;/ венце=м от те=рния облага=ется,/ покрыва=яй не=бо о=блаки;/ оде=ждею облачи=тся поруга=ния,/ и зауша=ется бре=нною руко=ю,/ руко=ю созда=вый челове=ка./ По плеще=ма бие=н быва=ет,/ одева=яй не=бо о=блаки./ Заплева=ния и ра=ны прие=млет,/ поноше=ния и зауше=ния;/ и вся терпи=т мене= ради осужде=ннаго,/ Изба=витель мой и Бог,/ да спасе=т мир от пре=лести,\ я=ко Благоутро=бен.

Слава, глас тойже:

Дне=сь неприкоснове=нный существо=м,/ прикоснове=н мне быва=ет,/ и стра=ждет стра=сти,/ свобожда=яй мя от страсте=й./ Свет подава=яй слепы=м,/ от беззаконных усте=н оплева=ется,/ и дае=т плещи= за плене=нные на ра=ны./ Сего= Чи=стая Де=ва и Ма=ти на Кресте= зря=щи, боле=зненно веща=ше:/ увы= Мне, Ча=до Мое=,/ что сие= сотвори=л еси=?/ кра=сный добро=тою па=че всех челове=к,/ бездыха=нный, беззра=чный явля=ешися,/

не име=я ви=да, ниже= добро=ты./ Увы= Мне, Мой Све=те!/
Не могу= спя=ща зре=ти Тя,/ утро=бою уязвля=юся,/ и лю=тое ору=жие се=рдце Мое= прохो=дит./ Воспева=ю Твоя= стра=сти,/ покланя=юся благоутро=бию Твоему=,\ Долготерпели=ве сла=ва Тебе=.

И ныне, глас тойже:

Днесь проро=ческое испо=лнися сло=во:/ се бо покланя=емся на ме=сто,/ иде=же стоя=сте но=зе Твои=, Го=споди;/ и дре=ва спа=се=ния вкуси=вше,/ грехо=вных страсте=й свобо=ду улучи=хом,\ моли=твами Богоро=дицы, Еди=не Человеколю=бче.

НА 6-М ЧАСЕ ТРОПАРЬ ПРОРОЧЕСТВА, ГЛАС 6:

Кресту Твоему поклоняемся Владыко, / и святое Воскресение Твое славим.

Прокимен, псалом 69. Глас 6: Да возрадуются, и возвеселятся о Тебе вси ищущии Тебе Боже.

Стих: Да возвратятся вспять и постыдятся:

Пророчества Исаиина чтение. [Глава 26, ст. 21. Глава 27, ст. 1 – 9.]

Се Господь от святого [места] наводит гнев на живущия на земли, и откроет земля кровь свою, и не покрывает избиенных. В той день наведет Господь меч святой, и великий, и крепкий на драконта змиа бежаща, на драконта змиа лукаваго: и убьет драконта сущаго в мори. В той день виноград добрый, желаше пети над ним. Аз град крепкий, град воюемый, всеу напою его: пленен бо будет нощию, в день же падется стена его. несть того, иже не возмет его. Кто мя приставит стрещи стеблия на ниве? ради вражды сея отринух и: убо сего ради сотвори Господь Бог вся, елика совеща: И сгорех, возопиют живущии в нем: сотворим мир ему, сотворим мир. Приходящая чада Иаковля: прозябнет и процветет Израиль, и наполнится вселенная плода его. Еда якоже той порази, и сам сице уязвится? и якоже сам уби, такожде убиен будет. Сваряся и укоряя отпустит я: не ты ли был еси помышляя духом жестоким убити я духом ярости? Сего ради отыметя беззаконие Иаковле, и сие есть благословение его, егда отыму грех его, егда положат все камене требищ сокрушено аки прах дробный: и не пребудут дрeвеса их, и кумиры их будут посечени, аки дубрава далече.

Прокимен, псалом 70. Глас 6: На Тя Господи, уповах, да не постыжуся в век.

Стих: Правдою Твоею избави мя.